

O Patroni mei, aulici Dei, succurrite,  
& Domino vestro hospitium cordis mei  
congruenter adornate.

V. Offer Regi tuo venienti humilitatem &  
sanctitatem Virginis matris Maria, fervorem  
& devotionem omnem Sanctorum, ut illorum  
merita suppleant quidquid humana tua non  
valet infirmitas.

Ascende ad altare tanquam ad Calvaria  
locum ubi Jesu Christi confixus cruci, cruci-  
figas carnem tuam cum vitiis & concupiscen-  
tiis, & sic ejus mortem efficacius annuntia-  
bis donec veniat. Omnem curam & diligen-  
tiam in eo ponas, ut quam maxima fieri  
polest cordis munditia, atque exteriori pie-  
tatis specie, hoc sacrificium peragatur, ut  
monet Trid. ita ut qui viderint te Minis-  
trum altaris, Dominum ipsum venerentur,  
S. Amb. & ad rerum qua in sacrificio latent,  
contemplationem excitentur. Trid. Memine-  
ris ergo istius quod scriptum est: Ignis au-  
tem in altari semper ardebit, quem nu-  
triet Sacerdos, subjiciens ligna manè per  
singulos dies. Lev. 6. v. 12. Ignis ille non  
est alius, nisi ille quem Christus secundum  
ordinem Melchisedech venit mittere in ter-  
ram. Sit perpetuus iste ignis in corde tuo, &  
quem nutrias piis ac crebris affectibus. Erum-

pat in adstantes divinus ille ignis, ut omnes  
amore Christi inflammentur. Cogita quo ani-  
mi fervore S. Martinus, S. Philippus Neri, S.  
Ignatius & alii divina tractabant myste-  
ria: time ne divinissimum hoc opus aded ne-  
gligenter faciens, maledicaris.

## ARTICULUS VI.

Exercitia post Misam & Communionem.

Monita salutis.

**P**eracta Missa & Comunione, cave ne tan-  
to hospiti qui visitavit te oriens ex alto, mox  
tergum obvertas, ad ludibria & inania te con-  
vertens, immemor beneficii, non curans cum  
eo paulisper conversari. Quid est hoc nisi vi-  
lipendere hospitem, imò etiam graviter of-  
fendere, delicias ejus respuere, & scandalizare  
pusillos? Nonne sacrilegium est, linguam  
tuam tremenda tractantem mysteria, tali  
sanguine purpuratam, factam aureum gladium,  
ad scurrilia transferre? S. Chrys. Ac proinde  
nonne hoc est hujus divini hospitis se indignum  
præbere delitiis? Ingratitudo enim est  
ventus urens, gratiarum fontem exsiccans.  
S. Bern.

Oportet ut non solum præpares te ad devo-

tionem ante Communionem, sed ut etiam te sollicitè conserves in ea post Sacramenti perceptionem; nec minor custodia post exigitur, quàm devota preparatio prius; nam bona postmodum custodia, optima iterùm est preparatio ad majorem gratiam; ex eo quippe redditur quis valdè indispositus, si statim fueris ad exteriora nimis effusus. Imit. Chr.

Quid ergo sic properas? quid quæris præter Deum tuum? Plus ille te doceat quàm omnes libri; plus delectabit quàm omnes amici; plura præstabit commoda quàm omnes mundi artes, opes, scientia, &c. Ex illo siquidem audies arcana quæ non licet homini loqui. Sancta Teresia à Jesu, id experta, credito.

Igitur ne defrauderis è die bono, & particula boni diei non prætereat te; duc tantum hospitem in cubiculum interius, id est cor tuum: cave à multiloquio, mane hic secretò, & fruiere suavissimo hospite tuo; ipsum enim habes quem totus mundus tibi auferre non potest. Delectare tunc in Domino, vaca, & vide quoniam est Dominus, exalta magnitudinem ejus, gusta saporis ejus dulcedinem; & licet pulvis sis & cinis, loquere ad Dominum tuum, loquere fiduciale ad eum,

sicut solet amicus ad amicum loqui; fruiere sine strepitu loquentis intus veritatis, sorbearis in illo silentio. S. Aug. Tribulationem tuam ante ipsum pronuncia, & effunde coram illo cor tuum; pete & accipies, hauri tunc ex Dominico fonte aquam salientem in vitam æternam, & scientiam salutis; ac gloriam illi dans, indue novum hominem, sentiens in te quod in Christo Jesu, & tantquam leo ignem spirans ab hac mensa recede, factus diabolo terribilis. S. Chrys.

## MEDITATIONES

## POST MISSAM.

- I. **Q**uis est ille qui venit ad me?
- II. Ad quem venit?
- III. Cur venit?
- IV. Quomodo venit?
- V. Quid à me tantus hospes requirit?
- VI. Quid hæcenus propter ejus amorem feci?
- VII. Quid nunc volo facere?
- VIII. Volo illud sincerè?
- IX. Quid facere debeo ut promissis stem?

Alia.

- I. Amplexus.
- II. Beneficium ponderandum.

- III. Admirare.  
 IV. Gratiarum actionis imparem se fateri.  
 V. Patri Filium pro gratis offerre, & se utrique.  
 VI. Gratiā ejus petere.  
 VII. Necessitates aperire.  
 VIII. Proponere.  
 IX. Media proposito efficaci congrua inquirere, & strenuè exequi, ut indè vera & sincera cognoscatur voluntas.

*Amplexus.*

Invenit quem diligit anima mea, tenui eum, nec dimittam, ut fiducialiter dicere queam: vivo ego, jam non ego: vivit verò in me Christus.

Nunc, ò Jesu requies mea, nunc dimittis servum tuum in pace, quia viderunt oculi mei salutare tuum: in te nunc deficit anima mea, in te nunc exultat cor meum. Verùm, quis mihi det, ò Deus cordis mei, ut in amplexu tuo, & in osculo patris lætus moriar?

*Admirare.*

O Jesu! ò sancte, innocens, impollute, à peccatoribus segregate, cœlis excelsior! tu venisti ad me? in me, malevolam ani-

mam, intrasti? Quis loquetur potentiam & misericordiam tuam? Ecquid tibi, Domine Rex gloriæ cum hoc fœtido sterquilinio? *Gerson.*

O Jesu mi! Quam admirabile est nomen tuum in universa terra!

Venite, audite omnes qui timetis Deum, & narrabo quanta fecit animæ meæ: suscepi misericordiam Dei mei in medio templi ejus; quinimò ipsum Angelorum Dominum ipsumque gratiarum fontem in medio cordis mei suscepi. Stupendum beneficium! Annuntiate hoc in universa terra, ut omnis spiritus laudet Dominum meum.

*Adora.*

Dominus meus & Deus meus! O Altissime super omnem terram, mortificans & vivificans, deducens ad inferos & reducens! Adoro te; tu enim solus es dignus accipere virtutem, & divinitatem, & fortitudinem, & honorem, & gloriam, & benedictionem; undè omnia ossa mea dicent: Domine, quis similis tibi?

Magnus Dominus & laudabilis nimis! Adorate eum omnes Angeli ejus, &c.

*Gratias age.*

Quid retribuam tibi, Domine Jesu, pro omnibus quæ retribuisti mihi, & præsertim hodiè? Sollicitus mei; dedisti mihi corpus tuum in cibum; & sanguinem tuum in potum, & utrumque in pignus futuræ gloriæ. O sacrum convivium!

Jam misericordia tua subsequetur me omnibus diebus vitæ meæ, ut inhabitem in domo tua in longitudinem dierum. Ideò exultabunt labia mea cum cantavero tibi, & anima mea quam redemisti. Sed & lingua mea tota die meditabitur justitiam tuam, cum confusi & reveriti fuerint qui quærent mala mihi. Repleatur os meum laude, ut cantem tota die gloriam tuam.

Magnificat anima mea Dominum, & exultet spiritus meus in Deo salutari meo.

Benedic anima mea Domino, & omnia quæ intra me sunt nomini sancto ejus. Noli anima mea, noli oblivisci omnes retributiones ejus qui visitavit te, & fecit tibi redemptionem, sanans infirmitates tuas. Laudate Deum meum omnes gentes, quoniam confirmata est super me misericordia ejus. Laudate eum omnes Angeli ejus, &c.

*Offer Deo Patris Filium.*

O Pater æterne, Pater misericordiarum, qui sic dilexisti me, ut Unigenitum tuum mihi dares in pretium & in cibum; cum eo omnia mihi donasti; respice in faciem Christi tui in quo tibi benè complacuisti. Hunc ego dilectum Filium, & cum eo cor meum retribuo tibi pro his quæ hodiè retribuisti mihi: complaceas tibi Pater hodiè in illo, ac per eum indignationem tuam averte à me.

Ecce mediator Dei & hominum Christus Jesus, Advocatus & Pontifex, qui interpellat pro me. Hunc ego offero tibi, ipsum, inquam, qui peccatum non fecit, sed tulit peccata mundi, & languores nostros suo livore sanavit.

Igitur suscipe, ò sancte Pater, sanctam hanc & immaculatam hostiam Filii tui in laudem & gloriam nominis tui, in gratiarum actionem pro omnibus beneficiis tuis in me collatis, in expiationem quoque peccatorum meorum, & in supplementum omnium defectuum meorum.

*Dilige Jesum qui prior dilexit te.*

Deus misericors, patiens, & multæ misericordiæ & verax, qui das escam timentibus



bus te, jam verè diligo te, fortitudo mea, quem inveni, & teneo. Quis mihi hoc tribuat, ut jugiter diligam te, qui ultrà quàm facere debueras, fecisti? Pereat cor meum, si desinat amare te, qui semper & ineffabiliter amasti me.

O Domine Jesu! ò dilecte mi! quid me vis facere ut placeam tibi omnibus diebus vitæ meæ? Doce me facere voluntatem tuam, abnegare meipsum, & adhærere tibi. O quàm bonum mihi illud erit!

O Jesu! ò amor mi! da ut diligam te in toto corde meo, nihil aliud posco. Scio enim quoniam diligentibus te, omnia cooperantur in bonum; & licet pauper sim & inops, laudabo nomen tuum, & tanquam nihil habens omnia possidebo: tu es Deus meus & omnia.

*Offer teipsum Christo, qui se tibi tam amanter offerre dignatus est.*

Suscipe Domine universam libertatem meam, accipe memoriam, intellectum, atque voluntatem omnem; quid quid habeo vel possideo, mihi largitus es, id tibi totum restituo, ac tuæ prorsus voluntati tra- do gubernandum; amorem tui solùm cum gratia tua mihi dones, & dives sum satis,

nee quicquam ultrà poscam. S. Ignat. Loy.

*Spera in Deo salutari tuo: thesaurum infinitum opum cœlestium, & ipsum gratia fontem hinc habes; avidè pete quantum vis; pete veniam peccatorum ac virtutes christiano homine & tua potissimum vocatione dignas; confide, & fides tua te saluum faciet.*

O clementissime Salvator! Quid mihi nunc denegabis, postquàm temetipsum tradidisti mihi in cibum & potum, & in pignus futuræ gloriæ? O quanta erit fiducia mea, cui cognita est tanta pietas tua! Igitur miserere mei secundùm magnam misericordiam tuam; si iniquitates observaveris Domine, Domine quis sustinebit? quis accedere ad altare tuum audebit? Ab oculis meis munda me, Domine, ab alienis parce servo tuo, & ignorantias meas ne memineris; parce mihi, si ea qua par erat præparatione & animi devotione non tractavi hoc mysterium ipsis Angelis timendum.

O Jesu, lux vera, quæ illuminas omnem hominem venientem in hunc mundum! da Domine, ut videam, ò lumen oculorum meorum, ut sciam quid desit mihi. Noverim te, noverim me, ut exaltem te & humiliem me.

O Jesu, qui cùm in forma Dei esses, temetipsum exinanivisti, formam servi accipiens, & qui in hoc Sacramento enutrens & exaltans filios, te sperni à multis, & conculcari à canibus sinis! discam à te esse humilis corde; da ut abominer vel minima superbix signa.

O Jesu, qui factus es obediens usque ad mortem, & qui in hoc Sacramento obedisti voci hominis! da ut cibus meus sit facere voluntatem tuam, & obedire Præpositis meis propter te. Deus meus volui, & legem tuam in medio cordis mei; da quod jubes, & jube quod vis.

O Jesu, Rex regum, qui cùm dives esses, propter me egenus factus es, non habens diversorium, nec ubi caput reclinares! O Jesu, qui cum plenitudine divinitatis habitas in templis pauperibus, tanquàm mortuus à corde! O Jesu, qui pauperum desiderium exaudire soles! inclina cor meum in testimonia tua & non in avaritiam, ut delecter in via testimoniorum tuorum, sicut in omnibus divitiis. O Jesu! tu thesaurus meus es, in te unico fixum sit cor meum; nec divitias, nec paupertatem dederis mihi, sed tantum victui meo tribue necessaria; ut habens alimenta, & qui-

bus tegar, his contentus sim. Quid amplius exoptet anima mea?

O Agne sine macula! ò Jesu, fili Mariæ Virginis, qui pasceris inter lilia, qui mihi dedisti hodiè illud vinum germinans virgines! cor mundum crea in me; tu scis quia non possum esse continens, nisi tu Deus dederis mihi. Verùm quamvis Angelus satanæ me colaphizet, sufficit mihi gratia tua. Da ergo ut sim, sicut Angeli tui in cælo, sollicitus tantum de iis quæ Domini mei sunt, ut anima mea, tota pulchra, sine macula & ruga audire tandem mereatur, *veni, veni de Libano soror mea, sponsa, veni, coronaberis.*

O Jesu! qui sitiens, felle & aceto potatus es, & qui omnis saporis suavitatem in hac mensa parasti mihi; aufer à me ventris concupiscentias; da ut tibi soli serviam, non ventri, aut voluptati; sim verò sobrius, ne unquam graveetur cor meum crapula & ebrietate.

O Jesu! qui in horto cum sudore sanguinis prolixius orasti, & qui ipsa nocte qua tradebaris, parasti mihi hanc mensam; oro te ut tibi Domino serviens, spiritu fervens sim; accende me hodie illo igne quem venisti mittere in terram; renovabor, ut con-

fido, spiritu mentis meæ; jam curram viam mandatorum tuorum cum dilataveris cor meum.

O Jesu! vide afflictionem meam: patientia mihi necessaria est ut reportem redemptionem. Tu es patientia mea, discam à te esse mitis corde; æquum est, ut qui calicem salutaris toties accipio, bibam passionis calicem quem tu bibisti.

O Jesu! qui pro inimicis tuis orasti, & qui instituisti hoc Sacramentum tanquam symbolum charitatis, *Trid.* ut diligam proximum sicut me ipsum, benefaciam his qui oderunt me; da mihi hanc charitatem, quæ est vinculum perfectionis, & sine qua nihil sum.

O Jesu! da mihi scientiam sanctorum, scientiam salutis, & scutum bonæ voluntatis, custodi animam meam ut pupillam oculi; da ut sanctus sim ego, quia tu sanctus es, ac serviam tibi in sanctitate & justitia omnibus diebus meis. O unum necessarium! Unum volo, unum quæro, unum desidero, unum mihi est necessarium: salvum me fac, Salvator mihi, da mihi amorem tui, contemptum mundi, odium mei, & zelum animarum. Si ergo inveni gratiam in oculis tuis, ò Rex, & si placet tibi, dona mihi

animam meam pro qua rogo, & populum meum pro quo obsecro, cætera tolle tibi.

*Poteris etiam hic rursus considerare Christum ut regem, ut patrem, ut magistrum, ut medicum, ut pastorem, ut redemptorem, & ut sponsum.*

I. *Ut regem.*

O Rex meus, & Deus meus! venisti ad me mansuetus. O Rex sæculorum! dominare per residuum annorum, dominare in medio inimicorum tuorum, & in medio cordis mei. Vivas ergo Rex in æternum; tuum, Domine, est regnum; non mea voluntas, sed tua semper fiat, sicut in cælo & in terra. Verùm, ò mi Rex, unde veniet auxilium mihi, nisi à te qui fecisti cælum & terram? Adjuva me, ne moreris.

II. *Ut Patrem.*

O Pater misericordiarum! ego sum infelix ille prodigus qui iniquè egeram, sed tu longanimis & multum misericors suscepisti me, delectasti super me, & satiasti me hodiè, non hircorum sanguine, non solum de rore cæli, de pinguedine terræ, & de vitulo saginato, sed pretioso corpore & sanguine tuo, & coronasti me in misericordia.

Sed quoniam misertus es mei, quomodo miseretur pater filiorum; ne reminiscaris delicta mea, sed reminiscere miserationum tuarum quæ à sæculo sunt. Rogo te, ut obediens sim tibi usque ad mortem. Ita Patet, quod placitum erit tibi, faciam semper.

III. *Ut Magistrum.*

O Magister sapientissime, qui docuisti me à juventute mea! loquere nunc ad cor meum. Paratus custodire sermones tuos, in corde meo abscondam eloquia tua, ut non peccem tibi; conservabo omnia verba tua, conferens in corde meo; ignitum eloquium tuum vehementer, & servus tuus diliget illud. Beatus homo quem tu erudieris Domine! Da servo tuo cor docile.

*O anima christiana! velut Magdalena stans retrò secùs pedes Domini & audiens verbum illius, audias pariter in silencio, & custodire coneris quid loquatur in te Dominus Jesus. Eloquia ejus in corde tuo abscondere satage.*

IV. *Ut Medicum.*

O Jesu, pie Medice! qui hodie descendisti, priusquam morerer, & qui non solum imposuisti mihi manum, sed etiam vo-

luisti languiores meos tuo ipso livore sanare, sana animam meam, quia peccavi tibi. Ingressus aliquando Zachæi domum dixisti: *Hodie huic domui salus facta est.* Ingressus jam es, ò Christe, domum animæ meæ, dic ei, quæso: *Salus tua ego sum;* ab omni specie mala sana eam, da illi integram sanitatem in conspectu omnium, & exiliens laudabo te & dicam semper: *Magnificetur Dominus qui benè omnia fecit, & mutos loqui, & surdos audire, &c.*

*Hic revela Domino viam tuam & infirmitates tuas quas ipse portavit: ora eum, ut te sanet ab illo languore quo tepidus es, &c.*

V. *Ut Pastorem.*

Erraveram sicut ovis quæ periit; sed conversus sum ad te Pastorem animæ meæ; & tu, ò Pastor bone, qui pascis me à juventute, imposuisti me in humeros tuos, & in loco pascuæ, id est, corporis tui, me hodie collocasti. Quid mihi deinceps deerit? Jam super aspidem & basiliscum ambulabo, & conculcabo leonem & draconem.

Ne discesseris à me, custodi me ut pupillam oculi, donec perducas me ad pascua vitæ æternæ.



VI. *Ut Redemptorem.*

Redemisti me Redemptor meus, & misertus es mei, solvisti vincula colli mei jam excussus sum de pulvere; ego, ò Jesu Christe, vinctus tui sum, servus tuus sum ego, & filius ancillæ tuæ, custodi animam meam, ut iterum jugo servitutis non continear: Tuus sum ego, in manus tuas commendo spiritum meum, redemisti me Domine Deus veritatis in sanguine tuo, ac eodem hodie lætificasti cor meum.

VII. *Ut Sponsum.*

O Jesu! tanquam sponsus procedens de thalamo suo sponsasti me tibi hodie in sempiternum: ego vicissim sponso me tibi; pone me ut signaculum super te, quem recepi hodie, & elegi ut esses mihi Deus. Deficiat in te anima mea, ò Jesu vita mea, liquefiat amore tui: mihi vivere, Christe, sis, & mori lucrum.

*Qui perseveraverit usque in finem, hic salvus erit. Pete ergo ut corpus Domini nostri Jesu Christi custodiat animam tuam in vitam æternam.*

O Jesu! tu verè dixisti: *Qui manducat hunc panem, vivet in æternum.* Hodie man-

ducavi hunc panem, sit ille mihi pignus gloriæ perpetuæ; da ut anima mea moriatur morte justorum.

O Jesu corona mea! quis me separabit à charitate tua? An tribulatio? An gladius? Hæc omnia superabo propter te, qui dilexisti me. Pono, te Deum adjutorem meum; te inquam, sine quo nihil possum facere, & in quo confortatus omnia possum.

## PACTA,

## ET PROPOSITA AMOROSA,

*Non quidem simul & coæternim, sed sigillatim per hebdomadas ineunda, & singulis diebus alternatim exercenda.*

## Propono.

- I. Omnia facere in gloriam tuam.
- II. Non conformari huic sæculo.
- III. Esse mitis corde, ut possim compati infirmitatibus proximi, & condolere iis qui errant, ac inde possidere terram, ac in patientia possidere animam meam.
- IV. Excutere omnem teporem, & esse fervens spiritu.
- V. Manere in solitudine, quoad f.

erit, sepire aures meas spinis, pangere fœdus cum oculis meis.

VI. Sobrius esse, & mortificari propter te in tali occasione N. tali modo N. &c.

VII. Ambulare coram te. Offero tibi adorationes Sanctorum pro omnibus momentis quibus non cogitabo de te.

VIII. Promovere gloriam tuam, & omnibus omnia fieri, ut omnes faciam salvos.

IX. Emendare illud vitium ad quod pronus sum.

*Expende quodnam sit illud vitium, & illud in gratiarum actionem, & Jesu, quem possides, cooperante, extirpare contende. Adhibe & tu aliquam mortificationem huic victoria congruentem, & quam, offerente se per diem occasione, exercebis.*

Denique juro & statuo custodire iudicia justitiæ tuæ. Adhæreat lingua faucibus meis, si non meminero tui. Adjuva me Deus salutaris meus, & propter gloriam nominis tui libera me, & salva me.

O Jesu! mane mecum Domine, quoniam advesperascit; venit nox in qua nemo potest operari; mane mecum, ò Jesu, ne me tenebræ comprehendant.

Sed saltem non dimittam te, donec benedixeris mihi. O! unnam accipiam be-

nedictionem à Domino & misericordiam à Deo salutari meo, quatenus eam de virtute in virtutem, donec facie ad faciem te videam Deum Deorum in Sion, quem velatum in sacramento, & per speculum in ænigmate video.

*Per manus & merita beatissima Virginis Mariæ & omnium Sanctorum commenda Deo Sacrificium, aut Communionem tuam, & eorum ope & intercessione pete ab illo fructum ejusdem Sacrificii & Communionis, ac tui propositi efficaciam.*

Pete quoque gratias pro proximis tuis vivis & defunctis, pro his præsertim quos habes singulariter commendatos.

Vade in pace, ò Christiane, ò Sacerdos: descende jam justificatus pœnitentiâ, & pane Angelorum confirmatus, jam non tibi vivas, sed Christo; ne obliviscaris Domini Dei tui, elice per diem actus jaculatorios Sacrificio & Communioni congruentes, eos præsertim quos suggeret unctio Spiritus.

*Cogita identidem quali sis insignitus honore, quali mensa fruaris. S. Chrysos.*

Et verò, si cum sancto sanctus esse facile quis potest; quidni sanctus eris, charissime Frater, tu, inquam, qui panem cœli ferè quotidie manducas, in quo habitat corporali-